



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa

4 Marsu 2014

Tribunál Distritál Suai kontinua hala’o julgamentu movel iha Distritu Bobonaro

Ba dala uluk iha tinan 2014, Tribunál Distritál Suai hala’o julgamentu movel iha Distritu Bobonaro. Julgamentu ne’e hahu husi 26-28 Feveireiru 2014 ba kazu hamutuk 29. Kazu hirak ne’e kompostu husi kazu krime 24 mak hanesan kazu ofensa ba integridade fízika simples 8, omisídiu neglijente 2, violénsia doméstika 4, violasaun seksuál 1, abuzu seksuál ba menór 1, krime la halo tuir obrigasaun alimentár 2, kazu omisídiu agravadu 1, omisídiu simples 1, abuzo konfiansa 1, krime flora no fauna 1, roubo 1, no infantisidio 1. Enkuantu kazu sivíl 5 mak hanesan divórsiu 1, puder paternal 4.

Husi totál kazu hirak ne’e, iha kazu hamutuk 22 mak hetan desizaun hanesan pena prizaun efetiva 1, suspensaun ba pena prizaun 4, multa 1, indemnizasaun 1, omologa 10 absolvidu 5. . Enkuantu kazu 4 sei decide iha 14 Marsu 2014 no kazu adia tanba arguidu sira la marka prezensa iha julgamentu movel.

“Tribunál kontinua hatudu komitmentu hodi realize julgamentu movel atu nune’e bele fasilita comunidade ne’ebé kbi’it laek husi área rural sira inklui atinji objetivu ida atu hakbesik justisa ba povu”, dehan Luis de Oliveira Sampaio, Diretór Ezekutivu JSMP.

JSMP observa katak iha mudansa pozitivu ba prosesu julgamentu movel iha kazu sira ne’ebé involve krime abuzu seksuál ba menór no kazu sira seluk ho natureza violénsia seksuál. Iha kazu sira hanesan ne’e, tribunál taka prosesu julgamentu ba públiku. Ne’e progresu pozitivu teb-tebes tanba tribunál proteze privasidade vítima menór sira no ema adultu sira atu la prejudika sira nia naran diak. JSMP hein katak iha futuru, tribunál movel sira kontinua aseguara katak interese diak vítima sira nia hetan protesaun adekuada hanesan dadaun ne’e.

JSMP mós apresia mudanças ba fatin ka salaun julgamentu ne’ebé seguru no konfortavel liutan, ba julgamentu hala’o iha eskritóriu Munisípiu no administrasun distrital. Liu-liu, tribunál maneja atu julga kazu sira involve krime ho natureza violénsia seksuál no menór iha Munisípiu no krime ordináriu sira seluk hala’o iha administrasun distritál.

Julgamentu movel ne’e prejide husi juís kolektivu ne’ebé kompostu husi Dr. Pedro Raposo de Fiquieredo, Dr. Costânsio Barros Basmerly, Dr. Argentino Luisa Nunes, Dr. Alvaro Maria Freitas no Dra. Florencia Freitas. Ministériu Públiku representa husi Dr. Felismino Garcia Cardoso no Dr. António Tavares no arguidu sira hetan defeza husi Dr. João Henrique de Carvalho no Dr.

Manuel Amaral husi Defensória Públiku nomos pesoa idonia na'in rua ne'ebé iha koñesimentu iha área legál.

Atu hetan informasaun kle'an favor kontaktu direktamente:

Luis de Oliveira Sampaio
Diretór Ezekutivu JSMP
Diresaune-mail: luis@jsmp.minihub.org
info@jsmp.minihub.org
telefone: 3323883/77295795
webiste: www.jsmp.tl
facebook www.facebook.com/timorleste.jsmp
twitter: @JSMPTl